



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 8

Malaysian sultan temi chuba tasen shimogo

Federico Gatti-i Juventus den tenangzüktepba yanglushi



VOL. XXI NO. 20 (ADOK 20) DIMAPUR KÜPTOKNÜ (SATURDAY) MONGPUTENI (OCTOBER) 28, 2023 ₹ 5.00

RPP-i CM den ozüing alema arurtem aser ILP indang tebilemba lemsatep

Dimapur, October 27, 2023 (TYO): Rising People's Party (RPP)-i Nagaland chief minister dang ozüing alema arurtem indang tebilemte aser ILP mapa akangshitsü onüktem shia shidi ka zülüogo.

Abdul Kayum Talukdar ta ser nisung ka New Market nung GB shimba atema ashishitep ken o adokba aliba mapang Dimapur municipal area nung non-Naga nungeri "GaonBura" olen amshiba magizüker, ta RPP-isa shi.

Gaon Bura (GB) mapa ya Naga nunger inyakyim dangbo masütsü saka Nagaland nung GB tem ya Naga customary laws and tradition ketdangsürtem lir. Anungji Dimapur municipality nung Marwari Representative mesüra Muslim Representative ta amshitsüla, ta parnokisa Chief Minister dang shiogo.

Nisungbaji Jain, Bihari, Bengali mesüra Muslim nunger tenüing nung shimtsü akok saka pa indigenous person ka asütsüla aser iba tetezüji par tebu/tebou nunger 1963 matongdang Nagaland nung arua alirtem asütsüla ta RPP-isa shi.

ULBs nung Naga GBs dak sendakba nung "Gaon Bura" ta masü saka "Colony Representative" ta amala olen kar amshitsüla kechiyong ULBs nung "Gaon Bura" ta asüba ya tim masü ta parnokisa shisem.

New Market, Dimapur nung GB Talukdar ya Non-Indigenous person ka lir ta jangjaogo kechiyong pa mesüra pa tebu/

Nagaland nung Technical Education kanga tongtipang

Dimapur, October 27, 2023 (DIPR): October 27, 2023 nü State Council for Technical Education (SCTE) indang 13 buba senden menogo.

Senden nung mendenji Transport & Technical Education Advisor Temjenmenba liasü aser pa ya SCTE Chairman lir.

"Nagaland nung technical education kanga dang tongtipang lir. Technical Education Department ajanga tang Polytechnics 9 ketdangsüa repringer aser ano teimba lapoka aotsü tebilemba lir" ta Temjenmenba-isa shi.

Tanü senden nung adenertemi ICIT nung Computer Engineering nungi Computer Science and Engineering aser Government Polytechnic Kohima nung Fashion Design & Apparel Production nungi Fashion Technology ta nüngja melentsü telemteba agiogo.

Maneni Government Polytechnic Seithekema-C, Chumoukedima nung Civil

tebou nunger 1963 matongdang Nagaland nung arua aliba kuli kecha mali. Anungji pa shimba ya ozüing melamar aser tangsa mapa nungi anentsütsüla ta RPP-isa shi.

Urban area nung GBs-i bendanger nem birth certificates, driving licenses, trade licenses amala mashii magütsütsüla kechiyong iba ya Home Department-i October, 1981 nung Temporary Residential Permits (TRPs) mesüra Temporary Residential Certificates indang sangdong agütsüba anema lir, ta RPP-isa shi.

State sorkari Dimapur district nung aliba kiojen ajak indang data-base ka renemtsüla aser Nagaland Municipal Act mapa shitak inyaksüla. 1963 sülen nungi 1979 küm Dimapur ya Tribal Belt ta sangdong magütsü tashi Nagaland nung non-Naga non-indigenous nisungtem ILP kübok medendaktsütsüla ta RPP-isa shi.

Tanüingba nisung ajak ILP kübok adentsüla aser Foreigners Tribunal tentetba den ozüing alema arurtem mita anüksü atema Department balaka lapoktsüla, ta RPP-isa metetdaktüsügo.

Maneni, Zubza tashi railway line yangluba ya melenshitsüla aser ibaji Dimapur sector nungi passengers o goods belentsüba masü saka Shokhuvi station nungibo goods dang abentsüla, ta RPP-isa Chief Minister dang shiogo.

Engineering course agir teimba akümtsü onük benoka lemsatep tang menden 30 agia aliba nungi 60 akümtsü lemtet.

Senden nung adenertemisa National Education Policy (NEP) 2020 den liromedema Government Polytechnic Peren nung Interior Design course for skill training tenzüksü lemtet.

Khelhoshe Polytechnic Atoizu nung Diploma level programs ajak anentsü aser Civil Degree courses agitsü mulungra Diploma programs nungi Degree programs melentsü lemtetogo.

Iba senden nung Advisor-1/ One aser All India Council for Technical Education (AICTE), New Delhi Representative Professor Rajendra B Kakde-i shisalen kar sayua liasü.

Maneni, Higher & Technical Education Commissioner & Secretary Anenla T. Sato, IAS aser Technical Education & Member secretary of SCTE Director Er. Vipulhou Lhoungu natia shisatsü lemsatepa liasü.

Nagaland küm 20 tsüingda nung dengue teimtiba putet

Kohima, October 27, 2023 (TYO): Küm 20 sülen taküm Nagaland nung nisung teimtiba Dengue tashidak putetogo saka tensa azüoka alir anungji maoksatsüla ta Hokolbarnü Health Department-i metetdaktüsügo.

"Department-i tensa jungjunga repringdar aser azüoka lir. Nagaland ajungalen nisung 2909 dak dengue puteta liasü" ta National Health Mission Nagaland nung Mission Director Dr E. Motsuthung Patton-i shi.

"2005 nungi records repringdangra taküm nisung teimtiba dak dengue puteogo. Taküm June ita nungi tenzüker samples 8107 tendangba nung nisung 2909 dak dengue putet" ta Directorate of Health and Family Welfare nung osangbener den jembidang Dr. Patton-i shi.

Tesüiba nung nisung teimtiba dak dengue putetbaji 2018 küm nisung 374 dak putetba liasü. Yaküm nisung 154 dak puteta liasü, ta paisa ash.

June 15, 2023 nü Dimapur nung Elisa Test ajanga dengue mezüing putet aser tang tashi nung Noklak dak alaka tanüingba district ajak nung dengue prokshio, ta Dr. Patton-isa shi.

Department-i district shia nung Deputy Commissioner-i anir Dengue Response Team tentetogo. Ano HFW Minister

asir Directorate Emergency Task Force on Dengue ajanga ketdangsüa State Task Force on Dengue tentetogo, ta paisa metetdaktüsü.

"Dengue agi shiranger teimtiba alibaj district ji Dimapur lir. Dimapur nung nisung 1,398 dak putet aser tanabuba nung Mon district lir" ta State Nodal Officer for Integrated Disease Surveillance Project (IDSP), Dr Nyan Kikon-isa shi.

Dengue puteta anepalur tajemba kümdagi aser iba tensa azüoka lir, ta paisa ash.

"September 29 nü Mon nung dengue agi shiranger ka asüba dak alaka iba tashidak ajanga asür maliasü" ta State Project Office, NHM Nagaland, Dr Mereninla-isa shi.

Dengue ya shiruru tila ajanga menatepba tashidak ka lir aser taneptsü menguteter. Akok tashi asenoki iba tashidak nungi jembua

alitsüla anungji merükmejua alitsüla aser ki temeket nung tzü atsüingdena mayutsüla ta health ketdangsürtemi ash.

Department-i workshops, house to house campaigns aser media campaigns ajanga dengue indang osang prokshia arur ta HFW Joint Director Dr Vezokholu Theyo-isa shi.

District Hospital Mon nung yipden 100 nungi 50 dang liasü aser iba jaji dengue agi shiranger anepalutsü asoshi tetsükdaktsü ajurua liasü. Ajisüaka Health & Family Welfare Minister P. Paiwang Konyak, Konyak Baptist Church Council, Mon MLA tem aser civil societies teyaritep ajanga yipden 150 kümogo, ta paisa ash.

Mon nung Chief Medical Officer Dr Theyo-isa tanga tesemtem nungi staff District Hospital-i anir arua nübo peridaktüsügo, ta paisa shisem.

Reported as on 26th October 2023			
Dengue			
Sl.No.	District	Total Positive	Death
1	Dimapur	1398	
2	Kiphire	59	
3	Kohima	141	
4	Longleng	17	
5	Mokokchung	46	
6	Mon	933	1
7	Peren	47	
8	Phek	23	
9	Tuensang(Includes Noklak)	1	
10	Wokha	197	
11	Zunheboto	6	
12	others (Assam,)	31	
Total		2899	

Vietnam nung North East India Festival amonger



Guwahati, October 27, 2023 (Agencies): Vietnam kübok Ho Chi Minh City nung Hokolbar nungi North East India Festival tenzüko. Iba benjung ajanga India aser Vietnam tesentaktep akangshitsü nükjidong lir.

North East India Festival lapokba sentong nung Vietnam kübok province balala nungi lennirtem aser telok aika aden. Tadenertem rongnung Department of External Relations, Ministry of Foreign Affairs, Vietnam Director Tran Phuoc Anh aser Vice People's Committee of Ninh Thuan Province Chairman Nguyen Long Bien na liasü.

Iba sentong nung milen tsüklokba sülen Mridusmita Das Bora-i Satriya tsüingsang aser Vietnam nung Indian Ambassador Sandeep Arya-i okila jemb. Maneni, Minister of State for External Affairs, Government

of India RK Ranjan aser External Relations Director Tran Phuoc Anh natia o jembia liasü.

Tanü Assam, Arunachal, Meghalaya aser Nagaland nungi sorkar ketdangsürtem aser mongin nisungtemi pei pei state indang onük jemb.

October 28 nü North East India Festival tanabuba anogo nung Incredible India Exhibition ka alitsü.

"Iba sentong ya Act East Policy nung amendaka lir. Yaküm India Prime Minister Narendra Modi-i Bangkok nung North East India Festival amongba ajanga India aser Bangkok tsüingda tesentaktep tajungba aküm aser iba ajanga South East Asia den tesentaktep akangshiba indang jembia liasü" ta North East India Festival Chief Organiser Shyamkanu Mahanta-isa shi.

"Taküm Vietnam nung onoki


sobaliba lemsatepba nung temulung agütsür. North East atema sabang ka ta ser tenzüka sentong tangbo India indang sabang tulutiba rongnung ka kümogo. Iba sentong ajanga sobaliba lemsatepba dang masü saka shishilembaba, shisaliok, tourism aser wadang balala ajungketer" ta Mahanta-isa shi.

North East India Festival nung Investment and Trade Session, Tourism B2B Meet, aser People-to-People Exchange Meet shilemtem agitsü.

Investment and Trade Session ajanga DoNER Ministry, Invest India aser Investor's Community of Vietnam tsüingda sensaksema shishilembaba wadang ulushitsü.

Maneni, iba benjung nungsa North East India nungi designer tajungtemi fashion show tulu ka ayonga agitsü aser idangji subsolemtsü balala sayutsü.

CRPF Range Mkg. nung NCC shooting practice tenzükogo



Dimapur, Mongputeni/Oct. 27 (TYO): NCC Shooting practice week sentong Mokokchung nung aliba CRPF Range nung tenzükogo. Mokokchung jila nung aliba school aser college tem nungi NCC cadets 60 nem 0.22 sporting rifles khashitsü maongka agüja liasü.

Iba sentong ya "Weapons Training' curriculum nung shilem ka ama ayongzükba lir aser iba curriculum nung theory aser dry practices ya pei kaket reju nung Associate NCC Officers (ANOs) aser Permanent Instructor Staff (PI Staff) of 25 Naga Bn NCC teyaritem nung sayur.

Injang shidakba khashishiba sentong ya mapang shia Shooting Range nungya ayongzükba aser mongin temi cadets tem dang lenmangtem

sayur. NCC tetsür aser teburtemi iba yimya angazüksü tejangraba tulu nung shilem agidagi.

NCC cadets nem training agütsüba indang jembidang, linük meimba aser takok anguba senso kumdaktsütsü mechi yimya tajungtem, camp nung telok külemi alitsü yimyatem, temang anema alitsü, yimjak nung jembitsü aser sobaliba tsütsü yimya balala angazükdaktsütsü mechi training ya agütsür, ta Col CST Swamy, Commanding Officer, 25 Naga Bn NCC ajanga ashi.

Iba dak alia ano NCC ajanga cadets nem uniform services indang entrance exams aser interviews nung takok angutsüsa renemtsür, talisa Army nung Officers aser Agniveers asoshi tesayuba balala agütsür.

NCC cadets tem entrance exam nung Central Government aser Nagaland State Government mapang nung marks tali agütsür, anungji sorkar mapa inyaktsü asoshi jangra aliba cadets tem asoshia NCC training ya kanga tongtipang lir.

Iba shooting practice ya Lt Col Siddharth Upadhyay aser First Officer Temjen nati anir 25 Naga Bn NCC nungi telok kati achayanger.

Iba firing range amshitsü asoshi 173 Bn CRPF ajanga agütsü aser 12 Assam Rifles temi technical aser medical tsütsü teyari agütsür.

Teyari balala agütsüba asoshi Commanding Officer ajanga 12 Assam Rifles aser 173 Bn CRPF nung Commandant tem dang pelaba lemsatepa liasü.

Sorkari PM Vishwakarma Scheme sayaogo

Dimapur, Mongputeni/Oct. 27 (TYO): Industries and Commerce Department, Government of Nagaland ajanga sangdong ka nung ashiba agi, 'hands-on trades' mapa nung sodaka aliba artisans aser craftspeople yaritsü nükjidong nung Government of India-i Pradhan Mantri Vishwakarma Shram Samman Yojana (PM Vishwakarma Scheme) sayaogo.

Pei sasa mapa inyaka alirtem mesüra item trades nung 'small-scale ventures' amenoktsü meranger tem iba scheme yagi ajangzüksü. Iba scheme indang nükjidong ya skill development, toolkit incentives, credit support, digital transactions atema incentives aser marketing assistance nung yaria artisans tem takum jenjang tajungbai ajungkettsü asoshi lir.

Iba scheme kübok trades item ya awajemer: Carpenter, Cobbler (Shoemsmith/Footwear),

Boat Maker, Armourer, Blacksmith, Hammer and Tool Kit Maker, Locksmith, Sculptor (Idol Maker, Stone Carver, Stone Breaker), Goldsmith, Potter, Masons, Basket Mat Broom Maker/Coir Weaver, Doll & Toy Maker (Traditional), Barber, Garland Maker, Washerman (Dhobi), Tailor (Darzi) aser Fishing Net Maker.


Iba scheme agitsü asoshi jangjateta aliba trades 18 nung beneficiary ya arishi küm tajemba agi 18 bo asütsüla, tenüng zülukba aser tajangzük ya kibong ka nung nisung kati dang agitettsü, sorkar mapa inyaker aser parnok kinungertemi iba scheme ya magitettsü. Kinungertem nungya kinungbo, kinungtsü aser kiyi mao aliba chirnurtem densema lir.

Teyari yamai angutsü: PM Vishwakarma certificate aser ID card angutsü, anogo 5-7

(basic) skill upgradation aser anogo 15 advanced skill training agütsütsü aser training mapang anogoshi sen 500 agütsütsü, sen 15,000 tashi alang Toolkit incentives agütsütsü, sen lakh 1 (collateral-free loans) credit support agütsütsü, quality certification, branding, promotion, e-commerce linkage, trade fairs, advertising, publicity aser danga marketing inyakyim ajanga marketing support agütsütsü.

Beneficiary enrollment ya Common Service Centres (CSC) ajanga agitsü aser iba atema Aadhaar Card, mobile number, bank details aser ration card nungdaktsü.

Iba scheme atema Ministry of MSME (Nodal Ministry), Ministry of Skill Development & Entrepreneurship, aser Ministry of Finance Services ajanga state sorkar tem den lungjemer inyaktsü.



Mokokchung District kübok Assembly Constituency 10 indang Draft Electoral Roll sayaba sentong ka Deputy Commissioner, Mokokchung indang Conference Hall nung October 27, 2023 nü agidang tangokba noksa ka nung Addl. Deputy Commissioner, Mokokchung, Chumlamu Humtsoe, Assistant Election Officer, Mokokchung, Renben Mozhui aser Political Party balala nungi ketdangsurtem angur.

DIPR kübok RTI atema ketdangsür shim

Dimapur, Mongputeni/Oct. 27 (TYO): Right to Information Act 2005 dak sendakba nung Information & Public Relations Department, Government of Nagaland kübok iba Act nung ajemdaker osangtsüsang lemsatepba ketdangsütsü asoshi Nagaland sorkari ketdangsür shimogo.

V. Maria Yanthan, Commissioner & Secretary,

Information & Public Relations ya Appellate Authority; Kusa Fithu, Joint Secretary, Information & Public Relations ya Public Information Officer aser Peter Chawang, Deputy Secretary, Information & Public Relations ya Assistant Public Information Officers ama inyaktsü, ta sangdong ka ajanga metetdaktsü.

NTC ajanga C. Akang Ao asükhu lemsatep

Dimapur, Mongputeni/Oct. 27 (TYO): Naga Hospital Authority Kohima (NHAK) nung October 26, 2023 nikongdang C. Akang Ao asüba osang angazüka aoksar, ta Nagaland Tribes Council (NTC) sangdong ka ajanga ashi.

C. Akang Ao ya Nagaland Tribes Council tenzükba aser züngsem tajung ka liasü, shibai tangatetba tajung nung masetshie nokdaka liasü.

Pa ya tajangshiba balala aliba aser lokti asoshi temolung

agüja aser bendanga inyakba nisung ka liasü. Pa anungji asüba ya Ao kin atema kisung masü saka Naga nunger ajanga asoshi takoksa tulu alitsü, ta NTC tir Toniho Yephthomi aser tongti zülur Nribemo Ngullie nati ashi.

Mangyimer kibong den asükhu lemsateper aser Tulusang Tsüngremi parnok nem tashi tasen agüjang ta sarasademtsür. Asür tanüla teti tatem maka tesunep nung anisüngzükjangma, ta NTC sangdong ajangasa ashi.



Addl. Commissioner of Excise, Moarenba Pongen-i Mokokchung GB Hall nung amshitsü asoshi plastic menden kar tenlaba Mokokchung District GB Association-i agizükba mapang tangokba noksa nung angur. Kanga dang nungdakba aliba oset tenlaba asoshi MDGBA, tir, Along Jamir aser Secretary Imlitemsu nati tetenlar dang pelaba metetdaktsü. Mokokchung GB Hall tasenba ya taruba November ita semzüksü sentong lir, ta parnokisa ashi. Mokokchung district nung GB ajak senteperbo 600 dak tali lir. Mokokchung, 27th October, 2023.

Nagaland nung menoknok atema state-level mock exercise agitsü

Dimapur, Mongputeni/Oct. 27 (TYO): State Level Mock Exercise on Earthquake Disaster for Nagaland atema sentong yanglutsü asoshi orientation aser coordination senden ka video conference ajanga October 27, 2023 nü Deputy Commissioner, Dimapur indang Conference Hall nung mena liasü.

Iba orientation mapang National Disaster Management Authority (NDMA) aser State Disaster Management Authority (SDMA) ajanga iba sentong indang osang tejangja lemsatepa liasü.

Table Top Exercise ka October 31, 2023 nung agitsü aser state tesem ajungalen

Mega Mock Drill Exercise on Earthquake Disaster for Nagaland Emergency Preparedness Exercise (NEPEX) sentong November 2, 2023 nü district ajanga nung agitsü.

Iba senden nungya Deputy Commissioner aser chairman, District Disaster Management Authority (DDMA), Dr. Tinojongshi Chang, NCS; Additional Deputy Commissioner, Yanthungbemo Kikon; Sub-Divisional Officer (Civil) aser district ketdangsurtem dena liasü.

Ajungben lendong mapang saksalema renema alitsü aser nungdakba teyari agütsütsü nükjidong nung iba exercise ya agitsü lir.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND : KOHIMA

NO.DHFW-21/FSSA/Workplan(MoU)/25/2023-24/10 Dated Kohima the 26th Oct' 2023

ADVERTISEMENT

Interview for filling up the following posts under Work plan (MoU) 2023-24 of Nagaland Food Safety Project, will be held in the Directorate of Health & Family Welfare, Kohima on the 9th & 10th Nov 2023 from 11:00 AM.

- 1. Academic documents from HSLC onward (Marksheet, Admit card & Pass Certificate)
2. ST and Indigenous Certificate, Birth Certificate, Computer Diploma Certificate, Employment Exchange Card, 2 (Two) numbers of recent passport photographs.
3. NOC from competent authority for Govt. employee.

Table with 7 columns: Sl. No, Name of the post, No of Post, Posting Place, Educational Qualification, Consolidated pay per Month, Date and Time of Interview.

Reporting time: 10:00 AM Venue : IDSP Conference Hall, DHFW, Kohima

- * Note: No TA/DA is admissible for attending the interview
* Age relaxation will be given as per Govt. norms.

(DR. RITU THURR)
Principal Director & Addl. Food Safety Commissioner
Directorate of Health & Family Welfare
Nagaland : Kohima

GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA

NO.HED/SCHO/2022-23/ Dated, Kohima, the 27th Oct. 2023

EXTENSION OF ONLINE SCHOLARSHIP APPLICATION IMPLEMENTED BY HIGHER EDUCATION

This is to inform all Educational Institutions and Students that the online scholarship schemes implemented by Higher Education have been extended till 15th Nov. 2023.

Sd/-
(Dr. A. NSHOGA)
DIRECTOR
HIGHER EDUCATION
NAGALAND: KOHIMA.

2024 LS Polls nung shilem magitsü atema SP lenir ka amokmeren

New Delhi, Mongputeni/October 27 (Agencies): Samajwadi Party lenir Rajesh Kashyap-i Hokolbarnü ashiba agi, 2024 Lok Sabha election nung metokteptsü atema pa amokmerena phone ajanga pa dangi call süogo aser iba dak sendakba nung pai police nem tashishiba ka agütsüogo. Police-i ashiba agi, tashishiba dak ajemdaker FIR ka benokogo aser bushisügangdang tenzüokogo. "October 18 nü ni phone call ka agizük aser phone asür yagi kü dang taruba Lok Sabha elections nung metokteptsü atema ashia. Ano October 19 nü ibala mesükba call ka agizükogo. Iba sülen ibala mesükba call kar agizükogo, koba ni police nem osang agütsüogo," ta Kashyap-i PTI dang ashia Samajwadi Party indang district unit tir Tanveer Khan-i ashiba agi, Shahjahanpur Lok Sabha (reserved) menden nung Kashyap tokteptsü akok. Lok Sabha elections atema Kashyap renemshi tenzüokogo aser pa nüboyimba sentong tenzüokogo. Mejangjaba nisung kari pa dangi call asü aser election nung metokteptsü atema amokmerena liasü, ta Khan-i ashiba den party-i Kashyap atema security meshiogo, ta shisem. Circle Officer (City) B S Veer Kumar-i, Rajesh Kashyap-i tashishiba agütsüba dak ajemdaker IPC sections 506 (criminal intimidation) aser 507 (criminal intimidation by an anonymous communication) kübok ken o ka benokogo aser pa amokmerena call asüba mobile number jangjatsü atema bushisügangdang tenzüokogo, ta ashia.

Bank of Baroda KOHIMA BRANCH National Highway 61, Kohima, Nagaland- 797001 Email: kohima@bankofbaroda.co.in
GARITAYOKTSÜ LIR
Bank of Baroda, Kohima Branch-i senotsü teyari agüja M/S. ZAREMO KIKON-i aliba gari/hadir koba senpur dang nungi meyipa agiogo iba ya tayoktsü lir. Iba gari alitsü jangrartemi gari tsüngdong arua asadangtsü aser osang tejangja agitsü atema ketdangsur den tongteprateptetsü. Offer letter den gari atema Earnest Money Deposit (EMD) ama refundable/adjustable Banker's Cheque/DD for Rs. 1,60,000/- (Rupees One Lakh Sixty Thousand Only) bener arutsü nungdaker. Gari alitsü jangrartemi gari atema offer letter ya envelope ka nung shibanger bener arutsüla aser tema nung "Quotation for purchase of vehicle No. NL-01/AD-9011" aser teküboklen shisema aliba gari tenüng zülur alitsüla aser kasa ya 13.11.2023 nü 4:00 ako tashi nungbo ketdangsur ket tongtsütsüla. Shibanger aliba quotations ya 13.11.2023 nü 5:00 PM nung Bank of Baroda, Kohima Branch nung gari alitsü jangrartem shirnoki offer benokogo, parnok matsügangdang lapoktsü. Gari alitsü atema takok ngua bidd asüri quotation lapokba anogo sülen mapang inyakba anogo pongu mesüra Branch tekolaki atakzüktsüba anogo tashi nung sen ajunga agütsütsüla. Sen magütsüetra pa agüja aliba EMD magi akümtsü aser gari yokatoktsü. Gari/Hadir ya "As is where is" basis nung ayoktsü aser Bank-i atakzükja aliba jenjang tekübok nung mayoktsü. Kuli kecha magütsü offer benokba agizüktsü aser magizüktsü asoshi ketdangsur ket nung tashi lir. Gari ya mapa inyakba anogotem aser Bank lapoka aliba mapang asadangtetsü.

Modi-i educational institution 100 atema 5G lab amenoktsüogo

New Delhi, Mongputeni/October 27 (Agencies): Ato Kilonser Narendra Modi-i Hokolbarnü education, agriculture, aser health amala wadang balala asoshi application tem terenlok atema educational institution 100 asoshi "5G Use Case Labs" amenoktsüogo. Pai, internet speed tajungba agütsüba ajanga libaliro tezübaba kümdaktsür aser education, healthcare, aluyimba nung teyari agütsür, ta ashia. "High speeds internet aser tesem ka nung internet amshitetba ya kanga tongtibang lir," ta pai India Mobile Congress (IMC) nung ashia, kong pai, Union finance minister Nirmala Sitharaman indang budget speech nung sangdongba ama lab tem amenokja liasü. Telecommunications department-i, lab tem amenoktsüogo aser iba atema sorkari sen intokba shilem 80 agütsütsü aser taruba küm pezü atema inyaksangshi nung intokba sen noklang nung noklang agütsütsü. Institution tem rongnung Technology, Indian Institutes of Information Technology, National Institutes of Technology, aser engineering college tem densema lir aser item institution tem yagi lab atema sen intokba shilem 20 agütsütsü. Lab shia nung faculty züngsem 10 aser kaketshir 50 alitsü. Lab shia den start-ups mesüra Micro, Small, aser Medium Enterprises pongu sendaka alitsü. Lab shia-i kümshia product 10 bosa yanglua tendangtsüla. Lab indang equipment tem rongnung 5G standalone infrastructure (mid-band), 5G SIMs, dongles, IoT gateway, router, application server amala densema lir, koba December ita nungibo agütsü tenzütsü. Lab ajak 2024 küm March ita nungibo inyaksangshi tenzütsü, ta ken o jangja aliba ketdangsur kati metetdaktsü. IMC nung o jembiba mapang Modi-i, India ya alima nung start-up ecosystems tem rongnung top three nung lir aser alima nung mobile phone yangluba linüktem rongnung tanabuba jenjang nung lir ta ashia. "Linük indang electronics exports tangbo lakh crore 2 dak tema lir," ta pai ashia. Kasa mapang nung Union communications and electronics and information technology minister Ashwini Vaishnaw-i ashiba agi, India nungi telecom equipment linük 70 dak temai yoker. Iba conference ya küm pezü nung khen agir aser 2020 küm Hyderabad nung agitsü liasü saka wara poktetba ajanga 2022 küm Geneva nung agitsü telemtetba agia liasü. IMC sentong nung Aditya Birla Group chairperson Kumar Mangalam Birla, Reliance Jio chairperson Akash Ambani aser Bharti Enterprises chairperson Sunil Bharti Mittal nungeria o jembia liasü. Satellites, koba solar-powered drone tem lir item ya ali nung maneni mapang talangka yimzüteter, item ya amshitsü ta parnoki ashia. 24/7 high-altitude long endurance drone tem yagi arrtsü nung traditional radar network nem teyari agüja local command center tem dangi indang indanga noksatem yoktsü. Drone aser software ajak India nung dang yanglutsü.

India-i drone amshia arrtsü anüktsü sentong yanglur

New Delhi, Mongputeni/October 27 (Agencies): Hamas-i ajungbena Israel amakba amala lendong nungi jenboa alitsü atema India-i drone amshia surveillance system ka amenoktsü sentong yangludar, ta ken o jangja alirtemi ashia. Linük defence ketdangsurtemi taoba hopta tsüngda linük nung surveillance and reconnaissance drones vendor trok den ajurutepogo aser taruba indang tashi nung order asüba indang sangdongtsü imlar, ta item nisungtem yagisa ashia. Military-i taruba küm May ita tashi nungbo arrtsü nung tesem kar nung iba system ya amenoka inyaksangshi asütsü merangdar, ta parnokisa shisem. Kidanger China aser Pakistan na den tensa mejungi aliba mapang tang arrtsü meita atatsü asoshi jenjang agidar. Ukraine nung rara ajanga PM Modi-i aniba sorkar linük indang armory, rara atema renemshiba asadangshitsüsa akümba mapang ka nung Hamas puri ajungbena Israel amakba ajanga takaratiba nung item jenjang agitsüsa kümdaktsüogo. Taoba mapang India-a ajungbena makogo. 2008 küm Pakistan nungi kiralongrartemi tziyim ajanga arur Mumbai maka nisung 166 tashi tepseta liasü. India-isa, anütoklen arrtsü len prangbong injang aser temesepba mozü shibelentsü atema drone tem amshir ta shiogo. Iba system yagi arrtsü ajunga ayimjemtsü atema ita 18 shi agitsü aser küm nung million 500 shi intoktsü, ta ken o jangja alirtemisa metetdaktsü. High-Altitude Pseudo India nung dang yanglutsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 28, 2023

Aener telok, molulem ozü

Joko tsüngküm mapang arurji asen limaia aener telok telok arutsü aser asenoka aotsü. Asenok, talisa Aor, sobaliba nung tajung kaji asenoki aener kanga akümtsübur aser meima amshir. Ibayongji, tangaria asenok dang meimer. Atangji, akhidangbo asenok asoshi aenertemji, kasa nisung, yimten, arogo, kinunger aser medemer enertem dang liasü saka tanübo shiruru aser ozüsangnu ajak asenok ener ama züngshitsüsa kanga nüngdaka kümogo. Item enertem rongnung tang asenok dangi aru tenzükbaaji molulem ozütem ya lir. Item ozütem ya ali nung telok tilala senzüba ozü masü saka ozü agi yimti kümteta alitsüsa parnok telok tulu kümer senzür. Parnok asoshi alima ajak ya par lima aser parnok ya talidak tesem ka nung küm junga malir, saka kanga temekonga masü aser kanga tatsüka masü ta asüba tesemtem bushia oagi amonger. Tanü asüng asenok shisarama dang ashi, akhi tsürabutembo A B C a mazüngyonga tashitemeteter aser shisataka liasü. Iba jagiang parnoki anüng nung ita petinu indanga metet aser ali nung tzüim indanga meteta jayajako aser tsüngküm mongpu takzütet. Aji oda, tang ama temekong mapang tenzükdang asen limai anüdoklen nungi ozü telok tulu anüng ajak tongdanga yima aruba ozü dang molulem ta ajaba ya tesüngmangtsü tapitet shisatsü ka lir. Molu tetezü tulu, anungji molulem tetezü molu tzü alema yima aruba agi molulem ta aja südi ta angateter. Item aener teloktem ya asen lima tesem kar nung anenzüker aoba agi asenoki tajangzük angubaji mereprangtettsü aser memetettsüa akok. Ajisuaka, Tsüngremi alima nung taküm alitsüsa yangluba ajak ya kati ka dak nendaktepa alitsüsa yangluba lir, anungji item ozütem jagi asenoki memeteti süngdonglidongtem meyiba nung yarir aser asenok asoshi menüngdakba mesen, longpen aser taküm sangnu ajak chitsür. Iba jagi asenok alu kümzük aser tashidak nungi jenbur. Atangji, asenok akhi tsüraburtem mapang nungi arem shiruru aser ozüsangnutem tangu asaa metepseti kümzüka ayutsüa asoshi sayubentsü o tajung agüja kümzüka aru. Aji oda, shiruru aser ozüsangnu tenarong metsüba mapang aser tebok nung techanu bena alidang, entsü amokdang mesüra techanu mesüdangbo metepseti wazüka yutsü. Iba jagi arem shiruru aser ozüsangnu tapu kata mesamai aren aser kati ka nüngdak peridaktsü. Iba tangatetba nung tanüa asenok dangi aruba aener molulem telok nem ya timtem kecha magütsüi parnoka sadoksadoka asen lima nung monger aotsüsa asenoki parnokji asen ener tajunga ta bilema toktsütsü tim. Atangji, parnok ya ozü telok tulu asünungji arem tulu aser tzü aser chiyongtsü peria angudak bushia amonger, iba jagi asen lima nunga tesem ka ana dak alaka parnok monger aoba mangutsü. Item tesemtem rongnung Wokha district nung Doyang Hydro project alidak tang tashi item ozütem ya küm shia lakh dak tali monger aoer. Ibayongji, Nagaland ya molulem capital ta naroküm agüja lir. Item ya anüdoklen temekong lima nungi arur aser asen lima mapang tatsüka monger Africa lima oagi amonger. Item ozütem kar tetsüng nungbo alima nung ozü libaliro indang metetnüa bushidangertemi electronic oset tila sendaker yoker aser iba jagi iba ozüji koba meta nung amongar meteter. Küm ishika jakdang asen lima nungia molulem ozü ka dak 'Longleng' ta zülur iba ama electronic oset mesülöker yokba asenoki angashiogo. Item ozütem alima tesem balala nung monga jajaba metetba jagi asenok nem tangazükba aika agütsür. Asen lima nung item enertem ya tangbo akhidang amongba tesem aika nung memongi paidoker oa adoker. Ibaji, ashiko, asenoki parnok amokmerenba agi asütsüa akok mesüra chiyongtsü peria manguba agi asütsüa akok. Joko, asenoki angatetadokerji, kodangsa item enertem ya asen lima nung arua mongdir parnokji aener tajunga ta bilema sademsadema mongdaktsütsübaaji asen awashi asütsüla. Atangji, tangbo molulem ozü tepsetra ozüngi merenshitsü saka ozüng tsübu masü, tangatetba agi inyakbasa topur tajungba.

OLEMSABANG

Ochishir agi anungakongba lima

L. Kika Pongener.

Tanü asen lima ya ochishir agi anungakongba lima ka lir. Loktiliba ajak nung ochishir lennir aser tenzük aser agi anungakongba ajanga tanü asen lima rajang kuma lir. Sorkar tenzükertema tazünpur/tulurtemi anir talakba tashi, ochishir agi anungakongba ajanga tanü asen lima sensak tia nung lir. Hau...niii, tenzük aser lennir ajak ochimashir/tamajunger danga...ta ashirba masü, saka lennir aika alima aser lokti meimba ochishir lennir tajung lir-ko. Ajisuaka, tanü asen lima/lokti nung ochimashir lennir teimba asüba agi asen lima shiranger. Lennir karbo semchir tashi ayungayunga chia-jema litettsüsa sen rizüngdena alitsü akok, aser karbo Crore-Patti tashia alitsü sudi, saka asen limabo sensak tia nung lir. Atangji, asen lima nung nübur teimba ka tepetzük tia/sensakpo jenjang nung lir. Kechiba alima sensak tia nung lir ta ashir (?) Kechiyong alima terenlok mapa inyaktsü nungdem nung aruba sen/nübur ajak meyong rongsen agi ochimashir ketdangser kar dang ajangzük. Yisu alima nung alidang, kenu anogo pai pa dak amangertem aser pa sülen anidakertem dang ashi, "Nenoki kü o nung lira, ajangla nenok atangji kü nütsüngtem lir. Aser nenoki ochiji metettsü aser ochi jagi dang nenok nuji kümdaktsütsü" (Yoh-8:31-32). Atangji, asenok dak ochiba/shitakba mali tashi nuji makümtsü.


Asen Naga lima ya noklang nung tokür shilem (90%) Khristan tamanger aliba linuk ka ta ashitsü akok. Anungji Naga lima yabo kodak lima amai alitsüba, saka tangar dang taaktsüka, India lima State ajunga nung ochimashiba State (Most corrupted state)-ji Nagaland-a ta angazük. Yisu-i Pilate chuba dang yamai ashi, "Ni ochi indang küli agütsütsü aso, aser aji asoshi ni alimai aru. Ochi meyong shir lir, parnok ajaki kü o angar. Ajisuaka, Pilate chubai Yisu dang...Ochiji kechi" ???...ta asüngdang. Yoh-18:37-38 nungji zünga iba indang shia angutsü. Tanü asen lima nunga Pilate chuba ama ochi-ji kechi'ar memetetba, aser meteta aliyongjia, mebenshiba ketdangser/yimsusur/lennir-i asen lima aniba aser yimsu asüba agi asen lima majunger. Ano tanga mapang ka nung, Yisu-i Yihuda nunger Farise-tem dang ..."Nenok tenuk tapok lennirtem"...ta ajaba angutsü. Tanü asen lima nunga Yihuda nunger lennir Farise/Saduki-tem ama lennir aika, pei agitsü agi sunger rongsen agi tenuk pokadoker, sorkar, yimden, arogo, mungdang, loktiliba ketdangsuba aser aniba agi asen lima majunger. Talisa, arogo aser mungdang mapa nunga dena ochimashi inyakba otsü/osang angashidang aoksar...!!!???

Yihuda nunger Farise-tem ama tanü asen lima nung tamanger tajung aika, tema tereprangtsü nungbo Temeshi nisung amai, saka libaliro, inyakshangshi aser jakla yimya agibo Khristan ka memesük aika angutsü. Tanü asen lima loktiliba ajak nung ochishirbo nokdaka meliteter, kechiaser ochishirji aikati sempar aser ochishirbo ajaki arishir aser tetla-tetshir. Tanü asen lima aser lokti nung ochishirbo pei kija (Single out) kuma-adoker. Lokti tenzükba mapa nunga ochishirbo maginur aser metenzükdaktsünür, kechiyong ochimashirtem ochimashi mapa inyaktsü mesademmer. Yimya agi ochishirji o-a tesashi/tesepa asütsü, kechiyong parnoki koba mapa tim masü/meshidak ta ajiteter, aji anemsü medeni indangindanga arrtsür aser metongshitsür. Ochishir jagi nungsen metsübur aser tulur-tilar-a mapir, aser shinga metsübur. Yongji lokti nung külem tenzük aser nübur aikati ochishirji sempar. Ajisuaka, lennir shirnok dak ochi mali, saka anemsü lir, parnokji o anep-aneper/o tanang asütsü, aser parnok jagi meshidaka ta metetyongjia ola madoki mangu ama toktsütsü. Ochimashir lennir jagi kodanga nungsen magitsü aser ajak tsütsü tajung agia yimjung nung alitsü. Tanü putu nungbo yamala lennirji dang loktiliba ajak nung küm talanglang tenzükter, kechiyong tanü nüburtem-ia yamala lennirji dang aginur. Tanü asen loktiliba ajunga nung ochishir lennir agi anungakongba agi asen lima/lokti ajak mepetmesü tia nung lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung Khristan kaketshir ka pur tamangba yimsü melendaktsü



Kaketshir Dorcas Adedayo Adekanola ya Kaduna State University ketdangsur temi pua bener oa Islam dangi meyipdaksüba sülen tang tashi mangur.

Abuja, Mongputeni/Oct. 27 (Agencies): Kaduna State University nung ketdangsur temi yaria Khristan kaketshir ka apu aser tashiyim amshia Islam dangi meyipdaksü ta campus nung telok kati ashi.

Iba university nung chemistry 1st year azünger arishi küm 20 tain Dorcas Adedayo Adekanola ya Fellowship of Christian Students nung züngsem tajung ka liasü, saka taoba ita la manguba danga züngsem temi metet ta Campus Mission Watch (CMW) lenirtemi ashi.

Iba university nung azünger Khristanpur kari September 20 nü lai tsürabor dang phone ajanga la yimya melenshiba indang khuret lemsatapa liasü aser la sama.

"La teti tetsübo nung lir ama ajitet, anungji campus nung Islamists temi amokmerenba ama angateter," ta CMW lenirtemi sangdong ka nung ashi. "Dorcas ya campus nung anogo ishika mangur."

La manguba osang lar tsürabor nem sangoktsüba sülen parnoki la indang mobile nung call südang.

"Lar jala indang phone ya ajungbena switched off asü, anungji la pua alirtemi call ya magizükdaktsü ta angateter, shiba campus tezülun Muslim putir ka kidang yua liasü," ta CMW leniri ashi.

"Lar tsürabor temi la ya university nungi anizüker aotsü ajema Islamists temi la ya campus nungi tashiyim amshia pua bener ao südi ta amanger."

La pua bener oa Islam dangi meyipdaksü südi ta tetsübo nung lar tsürabor temi la maliba indang school ketdangsur aser commissioner of police dang September 20 nü osang agütsü.

"Tasüngji, September 21 nü Dorcas Adedayo Adekanola ya Kaduna State University indang Muslim nung MAJLIS bus nung nikongdang 4:30 ako meta mener campus Chief Security Officer's (CSO) office leni oa angu," ta CMW lenirtemi ashi aser idangjisa lar tsürabor nemo sang agüja parnok CSO indang

office-i ao.

"Dorcas-i lar tsürabortem dang la ya Kaduna yimti nung Sultan Bello Mosque indang imam kidangi anur ao aser yangji lai memolungi ayu aser la Islam yimsü agizüksü asoshi ajungshi ta temai madoktsü amokmeren aser iba sülen campus-i meyiba anir aru ta ashi," ta CMW lenir temi ashi.

"University nung aliba Department of Biochemistry nung academic staff aser Muslim tsür Mallama Amina ya la indang 'godmother' ama shim aser la ajanga tashiyim amshia Khristan yimsü yutsür Islam dangi meyipdaksü aser Kalma Sha'ada züngdaktsü ta lai lar tsürabor dang ashi."

Amina-i la dang Islam yimsü aser sarasadem sayu aser Islam nung aben süoshi densema senotsü aser osettsüset agütsü ta lai ashi, ta CMW lenirtemi ashi.

University indang CSO ajanga la indang ken o ya Kaduna state commissioner of police nem agütsü aser paia meyiper Kaduna State Inter-Faith Commission dangi yok. Commission ajanga la indang ken o ya September 29 nü jembitsü liasü, saka tang tashi obendang magütsü lir aser Adekanola ya tang tashi la apurtem den lir, ta CMW lenirtemi ashi.

"Dorcas ya tang tashi Muslim lenirtem den lir aser lar tsürabor mesüra campus nung Khristanpur den mejembidaktsür. Iba ya ajanga KASU campus nung Khristanpur tetsübo nung lir," ta ashi.

University indang odongtar mesüra Kaduna State Inter-Faith Commission nungi telangzüba kecha magütsür.

CMW lenirtemi ashiba agi, campus nung senotsü peria aliba Majlis Muslim Sisters temi kaketshir aser staff tem Islam dangi meyiptsü ajungshir.

"Iba telok nungya university nungi tongtipang aser jenjang tulu aliba tetsürtem lir. Parnok ya kar professors, directors, senior lecturers aser non-academic cadres tem lir," ta parnoki ashir.

"Parnok ya kanga lungjema lir

aser kanga junga inyakyimer. Management, directorate, faculty, department aser Students Union sasep nunga parnok agents tem lir."

Kaduna state nung Muslim lenirtem aser Muslim nungeri amokbanga aliba state sorkari teyari nung iba Majlis Muslim Sisters yagi yimya balala amshia Khsirtenpurtem Islam dangi meyipdaksütsü meranger.

Campus nung item Islamists yagi Khristanpur pua bener aotsü, senzüka yutsütsü, teyari balala magütsütsü, tiazü nung tamangba yimsü mezüngmeshiba tai tongloksütsü aser tasa tamajung yanglua inyaksü meranger, ta CMW lenirtemi ashir.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaksüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadanga rongnung Nigeria ya jenjang trok buba nung lir, koba taoba küm jenjang tenet buba nung liasü.

ANOGO ABEN TSÜNGREM DEN

Taidok angutsü taidok agüjang

Aser ozüi kechi koda pi dang tai doka lir, aji oda ozü taia tokangma. Mathi 6:12

Mapa kar taidok agütsüba dang nungi agizüksüba tali senti lir. Asen menen khuret bener külen aseni tai inyakba ajak nungi nüji kümdaktsübaji tesüngmangtsü ka lir. Yisui nütsüngtem dang parnoki sarasademba shia tai tokang ta sarasademang ta sayu. Asenoki anogo shia Tsüngrem anema inyaker ta Yisui metet. Asenoki Tsüngremi aginüba jenjang matonger. Anogo kata Tsüngrem dang tatok memeshi-i süidaktsütsü makok.

Asenoki asen anema inyaker dang tatok agütsüra, Tsüngremia asenok nem tatok agütsütsü kechiaser asenoki koda tangar dang tai atoker Tsüngremi yamaji asenok dang atoktsü ta Yisui tekümdangtsü agütsü (Matt. 6:15). Tsüngrem yimyaji tatok agutsutsüba lir (Anitet 34:6-7). Asenoki Pa nütsüngtem sünera, asenoki Pa tatishitsü nung anidaktsüla. Teti asen tsükchir dang Tsüngremi tatok agütsüra, asenoki tilaba kecha inyaksü makok. Mapa kar nungbo tatok magütsütsüla ta Yisui mashi. Tatok magütsütsü Laishiba nung shia mali.

Nai kar nembo tatok magütsütsü mulungtetra ne tekülem aser sarasadem amajok (Matt. 5:23-24). Ne mulungjangi item tammangtem bushitettsü Tsüngrem dang asüngdangang. Nai taidok nungdak bushidang tangar aibelenji mesüka alitsü Tsüngrem dang asüngdangang, idangji nai rishikangshir asoshi "Oba, parnok dang tai tokang" ta sarasademtsü.

India nung 'godman' ka anema tamangertemi ken o benoka lir

Amritsar, Mongputeni/Oct. 27 (Agencies): India north tsütsü state ka nung Hindu nung temeshi nisung kati tamangba yimsü tsütsü temolung yirutsüsa jembiba mechi Khristanpur lokti tentet kati police nem ken o ka agütsüo.

Global Christian Action Committee nungi Jatinder Gaurav-i ashiba agi, parnoki Punjab nung Sokh nung asoshi temeshi yimti, Amritsar nung aliba police nem Dharendra Krishna Shastri anema October 23 nü ken o ya benok.

Shastri-i Khristanpur dak tenük yoka parnok anema o tamajung jembiba ta Gaurav-i ashir. Police temi ken o benoka iba nisungba anema ozüng tsütsü mera agitsüla ta pai akhang.

Madhya Pradesh nungi Bageshwar Dham nung putir tekolakba Shastri ya mangatettep adokdaktsür nisung ka ama züngshir.

Pai anogo asem asoshi Punjab semdangba mapang Hindu nung yimsü melendaktsütsü asoshi mesüzüker saka "temenen tashi" nem yamaji meinyakdaktsütsü ta shia liasü.

Pai iba o jembiba nung Khristanpur temolung yiru aser pai iba atema tatok meshiang ta ashir.

Ajisüaka Shastri-i memolung



Dharendra Krishna Shastri

aser "Ni Punjab semdangba nung nisung kar mepelaba ni meteta lir. Ni o jembiba nung parnoki tai apur... Nenoki maginera tai maket Hindu nung temolung teyirutsü. Onokia nenok temolung meyrutsütsü," ta ashi.

Iba sülen pai Punjab sorkar dang state nung 'anti-conversion law' yanglutsü ayongzük aser tai maket nisungtem mashileni anisar ta ashi.

"Bendanger tashi Hindu temples aser Sikh gurugwaras telungi maitdaktsütsüla. Parnok nem nisung shidanga tamangba yimsü balala nungi anizüker meyoxtsüla," ta pai ashi.

Dharendra Krishna Shastri yagi Punjab nung yimjung raksatsütsü meranga pai aolen ajak Khristanpur dak tenük yoker ta Gaurav-i ashir.

ajemdaker tapet mera agitsü ta police temi shiogo. Mera magira onoki tesashiba nung longkak aittsü," ta pai ashi.

Tamangba yimsü melenba indang Shastri-i jembiba nung ochi mali, ta Jalandhar diocese nung vicar general Father Mathew Kokkandam-i ashi.

"Catholic Church ajanga tamangba yimsü melentsü atema mejembir aser mesangdonger aser Punjab nung tashiyim amshia tamangba yimsü melendaktsüba otsü mali," ta pai UCA News dang October 25 nü ashi.

Amritsar nung Pentecostal arogo ka nung pastor Jaspal Mashi-i ashiba agi, yimtenren tsütsü nükjidong kar yur Shastri-i Punjab semdang.

Taruba küm general election agitsü lia pai tamangba yimsü tenüng nung nüburtem tsüngta telemsa adokdakja Hindu nung vote bendentsü meranger, ta Mashi-i tai tongloksü.

Shastri-i o meshidaki jembiba ajanga state tesem ajungalen Khristanpur temolung yirutsüo aser pei aliba yimti aser jila nung pa anema ken o balala benoktsü akok ta Pentecostal pastor-i ashi.

Sikh nung timba sür nütsüng yongsük million 30 dak tema aliba Punjab nung Khristanpur shilem 1.26 lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Sashi

(v) tango saketli odaktsüli ta arangzükba (breathe)
* Nisung aika tango sashi majungba agi timatemer.

Sashi

(adj) mit tamajung, ain adoka inyakba (furious)

OLONG PAITEP # 6678

1		2			3		4	
				5		6		
		7						
8								9
			10					
11						12		
							13	
	14		15	16				
17								
					18			

TIPIEN

- 1. Tangar tenzuka alir - (5)
- 5. Ibai shi asodang inoktsü junger - (6)
- 7. Nung ta asüba inyaknüsang - (6)
- 11. Tesem - (4)
- 12. Süngjang o temechni na tsüngda - (4)
- 15. Meyipa ashi - (6)
- 17. Ako - (6)
- 18. Mi aplok - (5)

LANGTSÜNGLEN

- 2. Ola tashii madok - (4)
- 3. Aikabo masü - (3)
- 4. Ter nung ti endok - (3)
- 5. Tejakleni masü - (9)
- 6. Akhidang chiyungba auso - (6)
- 8. Angateta aru - (5)
- 9. Amangbapur tentet - (5)
- 10. Shi nung masü - (6)
- 13. Junga tashi maküm - (4)
- 14. Remdak - (3)
- 16. Tanaben tenzük - (3)

OLONG PAITEP # 6677 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kioktsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azubenshi,
- 8. Lah, 9. Jangkok, 12. Akok,
- 14. Nashi, 16. Sür.

NAI-A YA METETTER MA



Akhidang nisung kati tasü mang agi lung kümdaktsü tasa nguteta liasü saka pai magic amshir ta aija pai züluba kaketji raksa endoktsü. Paji I taly nunger naturalist, cartographer, Egyptologist, aser anatomist tenung agi Girolamo Segato liasü. Lanuwa asü dang nungi Segato-i science indang angazüktsü tenzük. Pai tasü mang agi lung kümdaktsüba koba tang tashi meraksai lir, itemji I taly lima Florence yimti museum ka nung yua lir. Küm noklang aika tsüngda alima nung Science & Technology tsütsü kanga renloka oaka, tanü takotet scientist tajungtemia pa madoksar. Pa June 13, 1792 nü aso aser February 3, 1836 nü alima nungi pila.

Happy Birthday

Tenung : N. Zoe Jamir
Küm : 8
Tasoba anogo : 28th October
Talidak : Kumlong Ward, Mokochung
Temeim Zoe, na küm ti renteta anema lia tasoba anogo moatsü nung Tsüngrem tenung asanger. Ano maneni na takok nung len aniangma ta sarasademtsür.
~ Temeim Oja Oba, Peri, Obou Otsü aser kinungertem



BJP National President Nadda-i Mizoram nung manifesto saya

Aizawl, October 27, 2023

(Agencies): Bharatiya Janata Party (BJP) National President Jagat Prakash Nadda-i Hokolbarnü Mizoram election atema manifesto sayatsüogo.

Aizawl nung BJP state head office nung sentong ka agidang Nadda-i vision document sayatsü. Iba sentong nung Union Minister Kiren Rijiju aser Nagaland Deputy Chief Minister Y Patton na aden.

BJP-i Mizoram state ajungalen lanurtem drug achiba azüoktsü atema 'Drug Free Mizoram' ta ser maparen ka tenzüktsü ta JP Nadda-i ashi.

BJP-i 'Mizoram Education Upgrade' mission aser 'Zirlai Simathawana Mission' tenzüktsü. Education mission atema Rs 250 crore aser Zirlai mission atema Rs 350 crore lezmüktsütsü ta paisa ashi.

BJP-i Mizoram Sports Academy lapoktsü aser iba nung saisaponger nem scholarships agütsütsü. Iba Academy nung football, wrestling, weightlifting, hockey

aser badminton nung temulung agütsütsü, ta Nadda-isa metetdaksü.

Mizoram ya sporting state tajung ka kümdaktsütsü asoshi Mizoram Olympic Mission tenzüktsü aser iba ajanga Mizo lanurtemi Olympics nung shilem agitettsü, ta paisa shisem.

BJP-i Centre sorkar den yaritepa Zoram Medical College ya Regional Institute of Medical Sciences (RIMS) jenjang nung ajungkettsü ta paisa ashi.

BJP-i Queen Ropuiliani Women Empowerment Scheme tenzüktsü aser iba ajanga tanur tetsür shia nem Rs 1.5 lakhs tashi senotsü teyari agütsütsü. BJP-isa government sector nung tetsür nem mapa 33% lezmüktsütsü, ta JP Nadda-isa metetdaksü.

BJP-i Ayushman Bharat scheme kübok health insurance coverage Rs 5 lakh aliba nungi Rs 10 lakh kümdaktsütsü. Pradhan Mantri Kisan Sammaan Nidhi scheme kübok aluyimer nem kümshia Rs 6,000

agüja aliba Rs 8,000 akümtsü. BJP-isa Mizo Agri Mission tenzüktsü aser agricultural infrastructure tajungba kümdaktsütsü asoshi Rs 1000 crores agütsütsü, ta pai ashi.

BJP sorkari Centre aser Assam sorkar den yaritepa Assam den arrtsü ken o angatetteptsü. BJP-i Mizoram nung alirtem temeten kümzüka ayutsü, ta Nadda-isa ashi.

"Onoki report card politics nung amanger. Prime Minister Modi ajanga linük nung yimtenren sobaliba melenshiogo. Tesüiba nung nübortemi tamangba yimsü, kin, tesem nung ajemdaker election nung toktep aser item ajanga votes benden. Iba dang Vote Bank Politics ta aja saka Prime Minister Modi aruba sülen politics tangatetba melenshiogo. Tangbo politics ya mapa inyaktetba, ochishia inyakba, terenlok anguba, tesem ajunga renlokba, kin aser nisung ajak ajangzükba politics kümogo" ta JP Nadda-isa ashi.

Sikkim: Teesta ayong nung apu tanabuba lapokogo

Gangtok, October 27, 2023

(Agencies): North Sikkim nung connectivity yanglutsü atema mapa inyakba nung takok tulu ka nguogo aser ibaji Teesta ayong nung apu tanabuba yangluba lir.

Indian Army kübok Trishakti Corps ajanga iba osang tajung

metetdaksü. Sikkim nung tziümsüng lendong atalokba sülen Trishakti Corps ajanga connectivity maparen inyaka arur.

"Kanga dang meranga inyaka arur October 26, 2023 nü Mangan - Sanklang nung apu ka yangluzükogo. Anogo pezü nung dang apu yangluzük.

Mezüngbuba apuji October 22, 2023 nü lapokogo" ta Trishakti Corps-i metetdaksü.

"Dzongu, North Sikkim nungi MLA Pintso Lepcha-i October 26, 2023 nü apu lapoktsüogo. Iba sentong nung Indian Army aser BRO ketdangsürtem aden" ta parnokisa ashi.

Mapa lakh 1 nungi 87,782 agütsüogo: CM Himanta Sarma

Guwahati, October 27, 2023

(Agencies): Chief Minister Dr. Himanta Biswa Sarma-i October 27 nü Assistant Engineers (Civil) 62 nem appointment letters lema agütsüogo.

Parnok ya Water Resources Department kübok mapa nung shimok aser tanü Assam Secretariat Complex nung sentong ka nung appointment letters agütsü.

"Onoki May 2021 nungi sorkar mapa lakh 1 agütsütsü nangzükba ataloktsü asoshi

mapa inyaka arur. Tanü Assistant Engineers 62 nem appointment letters agütsüba züngsema tang tashi nung nisung 87,782 mapa nung shimokogo" ta Chief Minister Dr. Sarma-i ashi.

"Assam Police nung mapa tazüng 5000 aser Health department nung mapa 3,000 atema tawa job advertisements agütsüogo. Ano sorkarisa Grade-III aser Grade-IV categories nung mapa tazüng 8,000 aser Education department nung mapa tazüng

10,000 atema nisungtem shimoktsü" ta pai ashi.

"Kobi melii sorkar mapa 25,000 tema nung nisungtem shimoktsü aser iba ya Assam Assembly elections atema nüboyimba mapang onoki sorkar mapa lakh 1 agütsütsü ta nangzükba atalokba lir" ta Sarma-isa metetdaksü.

Iba sentong nung Water Resources Department Minister Pijush Hazarika, Education Minister Dr. Ranoj Pegu aser Additional Chief Secretary S. Abbasi nunger aden.



India sepai aser Manipur police commando külemi mita aodang Kangleipak Communist Party (KCP-Military Task Force) züngsem pungu apuba sülen agiba noksa ka angur. Parnoki Yaripok Yambem aser Changamdabi yimtsüngtem nung mita aodang S Kabikanta (32), Ng Tangba (30), S Nongpoknganba (22), Konsan Anao (26), aser Md Illiya Khan (30) nunger apu. Parnok ket nungi .32 pistol, .38 live ammunition, AK ammunition, INSAS ammunition, 7.62 SLR live ammunition, mobile phone handsets 5, Rs 2090 aser Hyundai i20 gari ka ngutetogo.

Naga nunger Dart asayartem asayamung balala nung shilem agitsü



Dimapur, Mongputeni/October 27 (TYO): Naga nunger dart asayartem Indian Darts Federation - National Championship 2023; PDD Malaysia Open Championship-India Qualifier aser PDC World Darts Championship 2023- India Qualifier nung October 28 aser 29 nü asayatsü renema lir. Iba asayamung ya Chennai nung asayatsü.

Naga nunger asayartem ya asayar tejen Lima Longchar-i anir asayatsü kong Neiketou Souhu, Kezha Semou aser Vikehelie Suohu nungera

densema lir. Parnok ya London nung asayatsü aliba PDC World Darts Championship aser Kuala Lumpur nung asayatsü aliba PDD Malaysia Open Championship nung India tenung nungi asayatsü atema qualify asütsü asoshi iba asayamungtem nung shilem agitsü. Asayamung anaprongla ya 2023 kum December ita asayatsü. Maneni asayartem India National championship nunga shilem agitsü.

Asayartem ya temulunger kar teyari agütsüba den parnok

sasa senotsü intoka item national level asayamungtem nung shilem agitsü renema lir.

Kasa mapang nung Nagaland Darts Association-i ayongzüka Annual Championship asayaogo aser team Dynamic School of Darts, Kohima den longjemer kum tepeyong itashia league asayatem asaya aruogo, koba national jenjang nung asayamung tulutiba asoshi terenemshiba ka liasü, ta Nagaland Darts Association Secretary Burakum Ao-i sangdong ka ajanga metetdaksü.

MDFA Trophy tanü nungi Quarter Final asayatsü

Mokokchung, Mongputeni/October 27 (TYO): MDFA Trophy 2023 tanü League asaya tembangogo aser asung October 28 nü nungi Quarter Final asayatsü.

Tanü October 27 nü tatembangbuba league asaya ARKA united aser 16 United Brothers tsungda asayaa liasü aser iba asaya nung ARKA United-i goal 8-4 agi 16 United Brothers koka liasü.

ARKA united aser 16 United Brothers tsungda asayaba mapang nung asaya tenzüker minute 9 buba nung ARKA United telok nungi jersey no 9 Imtikumba-i goal ka yoka par telok takoklen asü aser ano par telok nungisa minute 14 buba nung jersey no 12 Lumite-i goal ka metsüoktsü nung score 2-0 ta aküm, saka mapang tatsüka dang lir minute 17 buba nung 16 United Brothers telok nungi jersey no 18 Nikom-i goal ka yokteta 16 United Brothers teimla mesamai küma asaya meso. Iba sülen ARKA United telok nungi jersey 7 Putimeren-i minute 31 buba nung goal ka yok aser külen asayayonga aoba mapang nung 16 United Brothers telok nungia jersey no 17 Lemliba-ia goal ka yokteta score ARKA United 3 aser 16 United Brothers 2 ta nung anisungzükbaba mapang agi.

Anisungzükbaba mapang agir

külen minute 49 buba nung 16 United Brothers telok nungi jersey no 10 Wangnao Y. Konyak-i goal ka metsüokja telok ana score kasasa aküm aser iba sülenji telok anaprongla asayartem züngküm süshir asaya meso. Saka iba sülenjibo ARKA United telok nungi minute 58 aser minute 67 buba nung jersey no 9 Imtikumba-i goal ana yokteta liasü aser pai iba asaya nung goal asem yokteta hattrick ajangzüktet. Ano minute 50 buba, 66 buba aser minute 78 buba nung jersey

no 11 kumsangtongzüker, jersey no 20 Alisoba aser jersey no 7 Putimeren par asem goal asem yoktet nung ARKA United puri goal ajak agi 8 agutsü.

16 United Brothers teloki asaya matem tashi teimla mesamai dang asayayonga ao aser minute 80 buba nunga par 16 United Brothers telok nungi jersey no 17 Lemliba-ia goal ka yoktet, saka par teloki goal ajakbo meküptoktet nung ARKA United-i goal 8-4 agi 16 United Brothers koka iba asaya tembang.

Federico Gatti-i Juventus den tenangzüktepba yanglushi

Mongputeni/October 27, 2023 (Agencies): Juventus nungi 2028 tashi asayatsü atema tenangzüktepba yanglushi Federico Gatti pa indang career nung maneni tejakdangi tudar. Pa ya aayanger ka liasü aser amateur football nungi tenzükbaba sülen tang temaba jenjang tongtetogo.

Juventus-i sangdong ka ajanga ashiba agi, Italy nunger international asayar Gatti-i 2028 kum June ita 30 nü tashi atema tenangzüktepba ka yangluogo. Pa nem season shia euro million 1.5 agütsütsü, ta Italian media sangdong balala ajanga metetdaksü.

Arishi kum 25 tain ya division balala ajanga atuba mapang mapa balala nung aayanger ka liasü aser kum asem tejakdang ang Italy nung third tier nung asaya-a professional asayar ka küma liasü.

"Ni anepdang shia training-i aoba mapang ni inetetba ki

kong kübo aser ozü kibong lia liasü iba ki ajanga süier," ta Gatti-i ashi.

"Iba ki süidang taoba mapang bilemtetshir. Ni arishi kum 20 asudang football asayatsü atema ki toktsür ao tenzüker aser ni Turin-i meyipa arutsü ta bilema maliasü.

"Ajisüaka ni Juve-i meyipa aruogo aser anoshia ya pungmang ama dang lir," ta paisa shisem.

Juventus-i, Gatti ya taoba kum January ita Frosinone nungi alizük aser iba sülen pa ya first-team nung asayar ka kümogo. Pa taoba season Juve nungi tetoktepba ajak nung 27 ben asayaogo.

Iba season nunga Gatti, Juve pur league asaya teku nungi trok nungbo tetenzük nungi asayaogo aser iba ita tetenzüklen Torino goal 2-0 agi akokba asaya nung pai goal ka idakja liasü. Maneni Pa Italy team nungia anaben tashi asayar lir.

Asian Para Games: Archer Sheetal Devi-i gold medal angu

Mongputeni/October 27, 2023 (Agencies): Tang asaya aliba Asian Para Games nung Sheetal Devi-i tetsür individual compound event nung gold medal ka ngua la India tsürtem rongnungi kasa asayamung nung gold medal ana anguba mezüngbuba asayar kümogo. La ya teka anatsülen mali.

Hokolbarnü gold medal anguba densema Jammu and Kashmir nungi arishi kum 16 asayar yagi iba asayamung nung medal asem nguogo.

Iba hopta tetenzüklen lai compound mixed team event nung gold medal aser tetsür tarep asaya nung silver medal ngua liasü.

Sheetal ya July ita teka maketba tetsürtem rongnungi Para World Archery Championships nung medal ka anguba mezüngbuba asayar aküm. Iba asayamung final nung lai Singapore tsür Nur Syahidah 144-142 agi koka gold medal angu.

Kasa mapang nung Ankur Dhama-a iba hopta tetenzüklen India nunger rongnungi asayamung ka nung gold medal ana anguba mezüngbuba asayar kümogo.

Asayamung tembangtsü anogo ka anunga lia Hokolbarnü India nunger asayartemi kanga junga asaya tang tashi nung medal 94 ngua lir, kong badminton asayartemi medal 9 anguba densema lir.

Reigning Paralympic

champion shuttler Pramod Bhagat-i, single SL3 category final asaya nung külem India nunger asayar Nitesh Kumar 22-20, 21-19 agi koka gold medal angu.

Tokyo Paralympics silver medallist IAS officer Suhas Lalinakere Yathiraj-ia, SL4 final nung gold medal ngua liasü.

Kasa asaya nung Sukant Kadam-i bronze medal angu.

Tetsür SU5 final nung India tsür Thulasmathi Murugesan-i, 21-19, 21-19 agi China tsür Yang Qiuxia koka gold medal nguogo aser kasa asaya nung Manisha Ramadass-ia bronze medal ngua liasü.

Tebur SL3-SLF4 tarep asaya nung Nitesh aser Tarun nati gold aser Bhagat o Sukant nati bronze medal angu.

Tebur SH6 final nung kanga meranga asayar reigning Paralympic champion Krishna Nagar-i 10-21, 21-8, 11-21 agi Hong Kong nunger asayar Chu Man Kai mekoki silver medal dang ngua liasü.

Athletics nung Raman Sharma-i tebur 1500m T38 event nung gold, javelin throwers Pradeep Kumar (25.94m) aser Laxit (21.20m) nati F54 event nung silver aser bronze medal angu.

Discuss thrower Lakshmi-ia tetsür F37.38 asaya nung bronze medal ka angu aser Archers Rakesh Kumar-i tebur compound event nung silver medal ngua liasü.

BILEMDANGANG
"Tenüngsang agütsüba agi nü anogotem süngdakjang."